

17.25 CUNTRASTS SIN SRF 1

Esser da chasa – Quatter dunnas da Sent



«Nus essan vischinas, amias. Ida, Helen, Aita e jau. Nus essan quatter dunnas da Sent e nus essan qua da chasa en quatter differentas modas.»
 Uschia descriva l'autura tudestga Angelika Overath las quatter dunnas da Sent. Ella sezza e ses um Manfred Koch èn arrivads avant otg onns en l'Engiadina Bassa. Be il pli pitschen da lur trais uffants è vegnì cun els. Ussa cura ch'il mat cumenza la scola chantunala a Cuira sto la scriptura chattar ina nova moda per esser da chasa a Sent. Aita ha vivì be paucs onns en in auter lieu che Sent. Cura ch'igl ha sa preschentà ina bun'occasiun per lavurar, è ella turnada en sia vischnanca d'uffanza. Ses um Jachen enconuscheva ella anc dal temp da scola. Ensemen han els fundà famiglia e fabritgà si lur puraria a Sent. Ida viva a Sent dapi sia pensiun avant diesch onns. Creschida si è ella sco figlia da Randulins en la Svizra Bassa. Ses geniturs dentant avevan adina ditg, che Sent saja lur patria. Per ina matta n'era quai betg simpel da chapir, che la patria avess dad esser là, nua ch'ins passentava be la stad e nua ch'ils amis mancavan. Helen è arrivada avant 25 onns a Sent. «Jau era la dunna dad in indigen ed hai uschia svelt gì mia piazza en la rait sociala dal vitg», declera ella. Oz ch'ils uffants èn gronds e na vivan betg pli a chasa vul Helen cumenzar anc ina giada insatge nov en in auter lieu. Las reflexiuns da Angelika Overath mainan tras il film e creschan rapports tranter las istorgias da las quatter dunnas. I resorta che «Esser da chasa» ha numerus aspects.